

NAQQIUT**18. april 2024 nassiunneqarsimasoq taarserpaa**

Inatsisissatut siunnersuutiniq suliaqartarneq pillugu malitassiat atuuttut allangortinneqarnissaat pillugu Naalakkersuisut peqquneqarnissaannik Inatsisartunut aalajangiiffigisassatut siunnersuut, taamaalilluni inatsisissatut siunnersuutip nassuiaataani, nunat tamat akornanni pisussaaffinnut nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersuummi nassuiaasiortoqartassalluni, tassani immikkut inuit pisinnaatitaaffiit aamma nunap inoqqaavisa pisinnaatitaaffiit tunngatillugu. Naalakkersuisut suleriaasiat nutaaq ulloq 1. januar 2025 atuutilissaaq.

(Inatsisartunut ilaasortaq Mariane Paviasen)

Akissuteqaat

(Naalakkersuisut Siulittaasuat)

Siullermeerneqarnera

Inatsisissatut siunnersuutit suliarineqartarnerat pillugu najoqqutassatut malitassianik atuuttunik allangortitsinissamik Naalakkersuisut peqquneqarnissaannik Inatsisartunut aalajangiiffigisassatut Inatsisartunut ilaasortaq Marianne Paviasen, Inuit Ataqaatigiit, siunnersuuteqarneranut Naalakkersuisut sinnerlugit qutsavigisavara.

Naalakkersuisut siunnersuuteqartoq isumaqatigivaat, inuit pisinnaatitaaffii tassaammata inuiaqatigiinnut nukittuunut tunngaviusut ilaat. Naalakkersuisut pingaartippaat nunatsinni aammalumi nunarsuaq tamakkerlugu inuit pisinnaatitaaffiit tunngatillugu ataqininnerq kiisalu ersarissumik oqariartuuteqarneq.

Inuit pisinnaatitaaffii pillugit Kalaallit Nunaanni Siunnersuisoqatigiit Naalakkersuisuniit tapersersuinerput ingerlateqqipparput – siunnersuisoqatigiit suliassaasa ilaat tassaavoq nunatsinni inuit pisinnaatitaaffiisa siuarsassarnissaat illersorneqarnissaallu.

Inatsisiliornitsinni inatsisissatut siunnersuutit suliarineqarneranni malitassat Nunat tamat akornanni pisussaaffiit malinnissaannik ilaatinneqartarput. Inatsisit suliarinerini tamanna qulakkeerneqartarpoq inatsisiliornermi inatsimmut tunngavissat misissorneqarnerannut atatillugu¹.

Suliassaqarfinni assigiinngitsuni siunnersuusiornermut akisussaasuusumiit inatsisissatut siunnersuutiniq suliaqarnermi, pisussaaffiuvoq siunnersuummi kingunerisassat pingaarutillit tamaasa eqqumaffigissallugit aammalu siunnersuutip nassuiaataani nalinginnaasuni nassuiaassalluni tamatumani aamma nunani tamalaani pisussaaffiit ilanngullugit.

Nunat tamat akornanni pisussaaffiit pillugit nutaamik nassuiaasoqassappat inatsisissatut siunnersuummut attuumassuteqartunik siunnersuusiornermi tamakku nassuiaasersornissaat oqaasertaliussani ilaatinneqassappat. Tassanilu pisussaaffiit naammassineqarsinnaanerit aammalu piviusunngortissinnaanerit nassuiarneqassalluni. Inatsisiliornermi najoqqutassani Nunat tamat

¹Tamanna pillugu immikkoortoq 1.7.3-mi inatsisiliornermi periutsinut najoqqutassat annerusumik atuakkit.

akornani pisussaaffiit ilaatinnessaat ilaatinneqareermat najoqqutassat allanngortinnissaat pisariaqanngilaq.

Pisinnaatitaaffiit eqqartorneqartillugit pisussaaffiit aamma avaqqunneqarsinnaanngillat. Nunatut aammalu innuttaasutut inuiaqatigiinni nunarsuarmiooqataanermilu tamatta pisussaaffeqarpugut. Pisinnaatitaaffiit pisussaaffiillu ataqatigiipput, taamaattumillu pisinnaatitaaffiit aammalu pisussaaffiit inatsisit siunertaannut suliarineqarneranni naliliinermi ersarissumik ilaatinneqartassallutik.

Qulaani taakkartorneqartut aallaavigalugit Naalackersuisut allannguutissatut siunnersuuteqarput: **Inatsisissatut siunnersuutiniq suliaqartarneq pillugu malitassiat atuuttut Naalackersuisut qulakkiissagaat inatsisissatut siunnersuutip nassuiaataani, nunat tamat akornanni pisussaaffinnut nunat tamat akornanni Kalaallit Nunaanni Namminersorlutik Oqartussat malitassaanni pisussaaffinnut tunngatillugu inatsisissatut siunnersuummi ersarsissumik nassuiaasiortoqartassasoq, tassani immikkut inuit pisinnaatitaaffiitut pisussaaffiinullu aammalu nunap inoqqaavisa pisinnaatitaaffiitut pisussaaffiinullu tunngatillugu. Qulakkeerinnineq 1. Januar 2025-miit atuutilissaaq.**